



Tang opposition INDIA teloktep 'life support' nung lir: Omar Abdullah

Gill nem SA den T20 asayatsü temelaba agütsüogo

Nagaland-i Dabur dangi Zanthoxylum (Michinga) seeds 1.5 tonne yokogo

Kohima, December 6, 2025 (TYO): Nagaland-i Honibarnü Dabur India Limited nem Zanthoxylum seeds (Michinga) mezüngbuba shilem bener yokogo.

Kohima nungi Tezpur nung Dabur India Limited indang North East Unit dangi Michinga seeds bener yoka liasü.

Chief Secretary Sentiyanger Imchen-i SIRD Office Complex nungi gari apusoa yok aser iba ya Nagaland nung medicinal aser aromatic plants yokdokba nung tongti alizüng ka lir. Iba mapa ya Nagaland Bio-Resource Mission (NBRM) aser Dabur India Ltd. tsüingda tesentaktep ajanga inyaker.

Iba sentong ya kanga tongtipang aser state sorkari mapang talangka jembia aruba asangsang nung mapa akümer ta Sentiyanger Imchen-i ashi.

Nagaland nung medicinal plants aser herbs aika lir aser küm ter tejakdang tenzükba Nagaland Bio-Resource Mission ajanga item senti species junga anepalur ta pai ashi.

Dr. Kualalei-i anir NBRM team ajanga Dabur den Zanthoxylum atema buy-back agreement agiba atema tenüngsang agütsür ta Sentiyanger-isa ashi.

Zanthoxylum ya tera commercialized süadoker aser state ajungalen tsünüba agi shimtet. Ajisüaka Dabur-i 10 tonnes nüngdaker saka taküm Nagaland-i 1.5 tonnes ang yokteter, ta paisa ashi.

"Iba nung asenoki langka ka

angazüker aser ibaji aika nüngdakba lir. Nagaland aluyimba wadang nung tetsükdaksü aika lir. Aluyimertem aser entrepreneurs-i scientific cultivation benshitsu" ta Chief Secretary-isa ayongzük.

Dabur den tesentaktep ya tanga medicinal aser aromatic plants nunga alitsü imlar aser iba ajanga Nagaland nung aluyimertem aser entrepreneurs ajangzüksü, ta paisa metetdaksü.

Iba sentong nung Central Procurement and Planning Division, Dabur India Ltd., New Delhi Head Narayanan Ranganathan-ia Dabur ajanga küm 140 tashi Ayurvedic products aser medicinal herbs nung ajemdaker inyaka aruba osang lemsatop.

Dabur renlokba ya India ajungalen aluyimertem ajanga lir aser parnoki küm aika medicinal herbs agütsür, ta pai ashi.

India nung medicinal herb cultivation ya junga maliasü saka tawa sorkar maparen ajanga Northeast densema medicinal herb cultivation tajungba inyaker ta Ranganathan-isa ashi.

"Dabur-i Nagaland nung teinyaksü wadang aika aliba ajiteter aser iba ya medicinal herbs nung dang masü saka spices aser fruits nunga lir. Dabur putiotsü nung medicinal herb farmers-i tongti shilem agiba atema pelar aser onoki Nagaland nunga aluyimertem yaritsü tenangzükba lir" ta Ranganathan-isa ashi.

Cultural Show nung Arunachal Pradesh-ia shilem agi

Dimapur, December 6, 2025 (TYO): Honibarnü host Power & Parliamentary Affairs Minister K.G. Kenye aser co-host Fisheries & Aquatic Resources Advisor A. Pangjung Jamir nati anir Cultural Show agiogo.

Iba sentong nung NEC Secretary Satinder Kumar Bhalla, Lt. Gen. Abhijit S. Pendharker (GOC, 3 Corps), aser Bank of Baroda nungi senior executives Dr. Debadatta Chand o Beena Vaheed nunger aden.

26 buba Hornbill Festival 2025 nung anogo trokbuba Cultural Show nung Nagaland aser kidanger Arunachal Pradesh state nungi kin balalai shilem agia liasü.

Tanü sentong nung Ao Cultural Troupe-i Yimdongsü Yar, Tikhir Cultural Troupe-i Kuhlangnyi Tsin, Angami Cultural Troupe-i Tephrie Metsa aser Garo Cultural Troupe-i

Nanggorere Goserong ajanga shilem agi.

Maneni, Chakhesang Cultural Troupe-i Khuho Li, Kachari Cultural Troupe-i Jarafaglamwsanai, Chang Cultural Troupe-i Kongkin Dookbü aser Khiamniungan Cultural Troupe-i Khiamniungan nunger kou mejepba ia sayu.

Ano, Konyak Cultural Troupe-i Kak-goi-bih, Kuki Cultural Troupe-i Savailhun aser Longding, Arunachal Pradesh nungi Wancho Fusion Crew-i "From Roots to Rhythm" ia sayu.

Tatemsä, Lotha Cultural Troupe-i Rüjungro-To, Phom Cultural Troupe-i Elou Moksham Sham-a Konpo Pühnyü Nyeng, Pochury Cultural Troupe-i Chieh Chieh, Sumi Cultural Troupe-i Kimelepu Ajuyebo, Zeliang Cultural Troup-i Kantung Lin aser Yimkhiung Cultural Troupe-i Hüh Tsah Peh ia sentong tembang.

Minister John-i kintem putepa alitsü, Nagamese ajungkettsü ayongzük

Kohima, December 6, 2025 (TYO): Naga loktiliba nung kin aser kidong telemsa agientsüla aser ajak ka akümtsü atema Nagamese oshi ajungkettsüla ta Forest, Environment & Climate Change, and Village Guard Minister C. L. John-i ayongzükogo.

Department of Tribal Affairs kübok Tribal Research Institute (TRI), Kohima ajanga ayongzükba Tribal Cultural Mosaic lapoktsüsang CL John-i iba tayongzükba agütsü.

Iba sentong ya Janjatiya Gaurav Varsh aser Hornbill Festival nung shilem ka ama Naga Solidarity Park nung agia liasü. Sentong asoshi TRI Division, Ministry of Tribal Affairs, Government of India ajanga teyari agütsü.

Sorkar office aser arogotem tsüingda kin o kin telemsa adoker anungji Naga nunger loktiliba nung ibala telemsa adokba tangatetba agientsüla. Oshi ajanga nisung longjemer anungji

Nagamese ajungkettsü tim, iba ajanga Naga nunger tsüingda telongjem adoktsü ta pai ashi.

Nagaland nung opposition maliba sorkar aliba ya khenyongi balala lir, party balala süaka sorkar ka dang aser sensotemi mangatetteptem toktsür telongjem adoktsü merangtsüla ta Minister John-isa ashi.

Naga kin shia pei pei benjung amunger aser külem benjung kecha mali. Hornbill Festival nung shilem agiba ya tim masü ta nisung karibo mangateti bilemer, ta pai ashi.

Hornbill Festival ya kin ajak külemi shilem agitsü aser ka akümtsü atema sabang ka lir. Iba ya "unity festival" ama lir. Iba benjung ajanga Nagaland international stage aser global tourism map nung denogo, aser tamangba yimsü balala den meputep kecha mali ta John-isa ashi.

Iba sentong nung Naga kin 14-i sobaliba shilem. Sentong nung New Capital Baptist

Church, Kohima pastor Bendangtemsu-i temoatsü meshia sarasadem aser Tribal Affairs Secretary Angelina Tajen-i tesentepertem pelaa agizük.

Tribal Affairs department-isa tanü State-Level Indigenous Games Competition ayonga agi aser idakji kin balalai shilem agi.

Catapult Target Hitting Competition nung defending champion Shangtok Phom (Phom)-i mezüngbuba, Zulutoshi (Ao)-i tanabuba aser Jill Sangma (Garo)-i tasembuba jenjang takoktem angu.

Spear Throw Competition nunga S. Buktok (Phom)-i mezüngbuba, Khiti Kath (Rengma)-i tanabuba aser Zulutoshi (Ao)-i tasembuba jenjang takoktem ngua liasü.

Rice Husking Competition nung kin 15 nungi nisung 30-i shilem agi aser parnok rongnung Rengma nungeri mezüngbuba, Konyak nungeri tanabuba aser Zeliang nungeri tasembuba jenjang takoktem angu.

Nagaland state animal ajungkettsü atema Mithun Show agi

Dimapur, December 6, 2025 (TYO): Hokolbarnü Amphitheatre, Naga Heritage Village, Kisama nung 26 buba Hornbill Festival 2025 nung shilem ka ama Mithun Show ka agiogo.

Iba sentong ya Department of Animal Husbandry & Veterinary Services Nagaland-i Nagaland Mithun Farmers Federation aser HIT's-Chikhu Ghakhu Farmers Society Nagaland den yaritepa ayongzük.

"Nagaland nung Mithun metsüba kanga ajema akümer aser iba jagi Mithun farming ajungkettsü aser asentenshitsü

atema Mithun show ayonga agir" ta Animal Husbandry & Veterinary Services Joint Director Dr. H. Inato Jimomi-i ashi.

Tanü yimtsüng balala nung Mithun metsüba 90% tashi ajema kümogo aser iba ya meimchirtemi lirepa aoba aser farm balala lapokba ajanga lir ta pai ashi.

"Iba khuret ajanga Mithun metsürtemi Mithun farming nungi tsünüsenbongtsü dangi meyipogo aser parnoki metsüba Mithuntem yokdoker mesüra shi atema ayoker" ta Dr. H. Inato-i ashi.

"Nagaland sorkari Mithun ya 'State Animal' aser 'the Pride of Nagaland' ta sangoktsüogo saka Mithun kanga ajema kümogo. Department-i Mithun metsüba nung rongsenketzüng tsütsü tajangzük lir ta osang prokshitsü atema Mithun show ayonga agir. Anungji aluyimertem aser lanurtemi Mithun metsütsü ayongzük" ta paisa ashi.

Medziphema nung ICAR-National Research Centre on Mithun ajanga mapa tajung aika inyaker aser 'State Animals' teimba kümduksütsü meranger ta Dr. H. Inato Jimomi-isa metetdaksü.

Advisor Rio-i 13 buba Dimapur Night Carnival tenzüksü



Dimapur, December 6, 2025 (TYO): Urban Development and Municipal Affairs Advisor Zhaleo Rio-i 13 buba Dimapur Night Carnival tenzüksüogo.

Iba ya Hornbill Festival nung shilem ka lir aser Honibarnü City tower junction nung pai Carnival lapoktsü.

"Asenoki asen sobaliba aser products sayuba dang masü saka alima dang asen yimya sayudi. Asen lima reprangi arurtemi night

carnival nung stalls semdangdang yimyatsüya tajung sayutsüla. Tesemdanger shiai Naga nunger indang tajung dang bilema yoktsüla" ta Zhaleo Rio-i ayongzük.

"Hornbill Festival ya tanü Kohima nung dang masü saka Mon, Wokha, Tuensang aser tangalen amunger. Dimapur area atema kümshia temulung agütsür kechiyong sentong ajak ya Tourism Department den amalitepa ayongzük" ta paisa ashi.

"Hornbill Festival ya kümshia tashitaitba küma amunger. Iba sentong ya sobaliba aser inyaksangshi sayuba dang masü saka kin balala telongjem aser akangakanga noktakba benjunger" ta Zhaleo-isa shisem.

Kümshia Dimapur Night Carnival ya Dimapur Municipal Council, Dimapur Chamber of Commerce and Industries, aser District Administration külemi yaritepa ayongzük.

Trance Effect-i Thailand indang kenten benjung tulutiba nung shilem agi



Dimapur, Luchii/December 6 (TYO): Nagaland nungi pop-rock band Trance Effect puri international jenjang tongteta Thailand nung Big Mountain Music Festival nung shilem agiogo. Iba kenten benjung ya Asia nung ibala mesükba benjung tulutiba rongnung ka lir.

Taküm iba kenten benjung nung sabang 14 nung artists 100 dak temai shilem agi, aser iba ajanga kenten yimya balala, sobaliba aser linük balala nungi nübürtem longjemdaksüogo.

Trance Effect indang set ya yakta dang tangar dang nungi balaka aküm aser benjung nung

shilem agirtem aika atsüa arua liasü. Parnok kenten yimya aser music, oshi balala nung ken mejema atenba aser sabang nung lokti atsüa arutsüsa arakzüa kentenba ajanga benjung nung adenertem den kanga junga sendaktepa liasü.

Parnok performance ajanga Southeast Asia nung sabang tulutiba ka nung tawa tanü Indian indie scene sayuogo.

Benjung Director-i bandartistry kanga nüksüba lemsatepogo, aser parnok kentenba yimya tajung asoshi tenüngsang agüja liasü. "Indian music ya tapu balala meyokteper lir aser Trance

Effect-i aji kanga junga sayuogo. Parnoki ola agi dang masü saka tanüla agi nübürtem arakzüdaksür," ta pai ashi.

Big Mountain Music Festival nung shilem agiba ya Trance Effect asoshi alizüing tasen ka tongtetba lir. Linük balala nungi nübürtemi parnok ken angaba den Southeast Asia nung nübürtemi tejangraba tulu nung telangzüba agütsüba sülen iba kentenba telok yagi parnok arrtsü atsülangsidar aser independent Indian music kanga kara renloka aoba kuli agütsür aser alima nung sabang tuluba atema renema aliba sayur.

Nagaland Angh-i Armed Forces Flag Days salem lemsatep

Dimapur, Luchii/December 6 (TYO): Nagaland Angh Ajay Kumar Bhalla-i, Armed Forces Flag Day salem lemsatepogo. Iba anogo ya kümshia linük atema pei taküm bendanga agütsürtem aser sepaitem tushitsü atema December 7 nü amunger

Pai ashiba agi, linük asoshi pei taküm bendanga agütsürtem aser tasütait sepaitem shirnok duty nung aliba mapang yiruogo, parnok tushitsüji asenok mapa dang masü saka parnok kibongtem nema tenüngsang agütsütsüji asenok mapa lir, shirnoki sepaitemi pei taküm

bendanga agütsüba nung tongtibang shilem agir.

Maneni pai lisopurtem dang Armed Forces Flag Day Fund atema mulungsoa tenlatsü mepeshia metetdaksüogo, koba defence personnel tem, rara nung asürtem, rara nung asür kinungtsürtem aser ex-servicemen aser parnok dak metaloker alirtem nem teyari agütsütsü asoshi tenzüka lir.

Angh-isa, asenoki Armed Forces bilemteta parnok nem tetushi agütsüba mapang, linük meimba aser tenüngsang agütsüba tanüla agi ajak ajungmesotsü imlaba lemsatepa liasü.

Pongo nung Manü benjung takok ngua mungogo



Longleng district kübok Pongo yimtsüing nung mezüingbuba Manü benjung amungba mapang Pongo doong (manü) sayaba noksa nung angur.

Mkg DPDB senden den repsema Christmas jili amung



DPDB pur Metsüben Resort nung senden den repsema Christmas jili sentong akaba mapang shilem agia adenertem külemi tangokba noksa nung angur. (Mokokchung, 6th December, 2025)

Mokokchung, 6th Dec (TYO): Mokokchung District Planning & Development Board pur Metsüben Resort nung DPDB senden den repsema Christmas jili sentong mungogo.

Iba sentong nung MLA & DPDB Chairman, Nuklutoshi-i jembidang, Christmas, koba asen Kibuba aser Kümtetdakba Yisu Khrista asoba anogo bilemteta amunger, iba ya ajanga temeim, tesünap, ajemalu aser pei sasa bendanga agütsüba taküm tenzüka indang asenok nem bilemtetdaksür. Item jenjangji asen taküm nung anogoshia tongtibang lir aser maneni ochishia, ajak dena aliba aser tejakleni aoba loktiliba ka yanglutsü asoshi asenok len anitsü. Christmas tanela shitakbaji benjung amungba dang masü saka asenoki aria bilemba, tangatetba aser telungjem agi kadi ka tenzüksü mulunga aliba nungji lir, ta ashi.

Iba temeshi mongpu benjong

amungdang asen loktiliba ajungtsü atema asenok ajak lungjemer teinyaktsü tim mapa inyaktsü asoshi shisadangtsü mapang tajung ka lir. Terenlok ya nüngdakbatem yangluba dang masü saka lokti tsüngta tesentaktep aser tamang akangshidaksür. Anungji, asenok külemi lungjemer inyaktsü, ochi shia alitsü aser Mokokchung district ainba aser terenlok nung shilem tajung agitsü asoshi tenangzüka tasen ka agidi, ta paisa ayongzü.

Paisa department, institution, arogo, lokti lennirtem aser nübürtem ajaki asen district terenlok nung temulung agüja inyakba asoshi tenüngsang agütsü. Nenok amalitepa inyakba aser bendanga agütsüba ajanga terenlok mapatem tejakleni aotsü aser public service tajungba kümdaksütsü asoshi tongti shilem agiba asoshi paisa pelaba lemsatep.

"Iba benjung mapang ki ajak nung yimjung, azükaru aser anema aliba bener arudakjang aser taruba kümji ajak asoshi maongka aser terenlok tali lidakjang ta sarasademtsür", ta pai moaja metetdaksü.

Mokokchung Town Baptist Arogo, Youth Director, Akangtemsü Yaden-i Christmas osang aben. Iba sentong nung Mokokchung Deputy Commissioner, Ajit Kumar Verma, IAS-i tarurtem pela-a agizükba o jemb. Ao Senden Tongti Zülur, Imtipokym-ia mapang tatsüka agia tepela o den Christmas salem osang lemsatep. Mokokchung ADC, Atsüngba Walling-i melepzüng o ashi. DPO, Land Revenue, Sentinungla iba sentong nung menden liasü. Mangkolemba E.E, R & B, Er. Chubatoshi-i sarasademter sentong tenzü. Sideline teloki Christmas ken tajung ka tena tesentepertem ajungmeso.

Dimapur, Luchii/December 6 (TYO): Longleng district kübok Pongo yimtsüing nung Manü benjung anogo ana muner December 6 nü tembangogo. Benjung shibangba sentong nung District Agricultural officer Longleng, Maongsangla alakteta jaoker liasü.

Benjung ayongzüka committee aser Pongo yimtsüing nung alirtem nem tenüngsang agütsüba mapang alakteta jaokeri, Longleng District nung iba amala mesükba mezüingbuba benjung takok nung tembangogo, ta ashi.

Laisa, tanü nungi tenzüka manü aser iba aonsotsü tsünüba ya map nung sayutsü ta ashi. Lai, aluyimertem dang manü tali adokdaksütsü atema alu tuluba ayimtsü ajungshia liasü. Laisa, educated unemployed lanurtem dang state kübok tesem balala aser state adena or tanga tesemi manü ya yoktsü atema shishilembadak balala den sendakteptsü asoshi jenjang agitsü ajungshia liasü.

Manü ya tsüngsang mopung kangabo mashishiba aonsotsü ka lir, aser asen lima nung kanga ajunger aser timba adokdakja aluyimertem sen timba aazüktsü lenmansadema lapoka lir, ta lai ashi.

Tatem nung lai Pongo yimtsüing ya centre ka asütsü, kong Agri. & allied department tem longjemer district nung aluyimertem inyakyimtem asadangtsü, ta ashi.

Iba sentong ya technical session ka agir tembang, kong aluyimertem nem KVK ICAR, Longleng nungi senior scientist-i scientific farming indang tangazükba agüja liasü.

Iba benjung ya Pongo yimtsüing nung manü kanga junga


tsünütetba benjungtsü aser wazüka ayutsü nükjidong nung ayongzüka mungogo. Iba benjung ajangsa sustainable agriculture ajungkettsü, senotsü tali aazüktsü aser aluyimertem shishilembadak balala den sendakteptsütsü imlar.

Benjung ya aluyimertem libaliro jenjang tajungba kümdaksütsü, sobaliba indang tangazükba agütsü, manü ya temang atema koda tajung aser shishilembada tsütsü koda tongtibang iba indang angazükdaksütsü atema mungogo. Iba ajanga lanurtem aluyimba, entrepreneurship nung shilem agitsü ajungshir, aser Pongo Doong (manü) ya state aser national jenjang nung regional brand ka akümstü asoshi jenjang yanglutsür.

Pongo yimtsüing ya Longleng District Headquarters nungi km 8 dang pilar lir aser iba yimtsüing ya Nagaland nung manü (Colocasia esculenta) tajungtiba tsünütetba atema nüngtugu lir. Iba manü dang ya "Pongo Doong," ta ajar koba Pongo yimtsüing meraket lir, aser iba ya district nung aliba nübürtemi dang masü saka kidanger district nung aliba nübürtemia kanga sapua achir.

Pongo Doong ya tachitsü balaka aser mapang talangka meraksar. Yimtsüing ali temo asüba aser tsüngküm mongpu ajungba ajanga iba manü ya tangar dang nungi balaka asür.

Sentong nung Hongnyu yimtsüing Village Council chairman Y.L. Ongba-i lokti pela agizükba o jemb aser Associate Pastor, Pongo Baptist Church, Metlu-i Tsüngrem temaotsü meshizüka sarasadema liasü. Sentong ya T. Amen aser Nanglang Y. Phom na lenisüba nung agia liasü.



December 06, 2025 nü New Delhi nung linük tatong Tir, CP Radhakrishnan-i taoba mapang Ato kilonser aser JD(S) tongti lenir, H D Deve Gowda ajurua senden amendang tangokba noksa nung angur.

Tang opposition INDIA teloktep 'life support' nung lir: Omar Abdullah

New Delhi, December 06 (Agencies): Honibarnü Jammu & Kashmir chief minister Omar Abdullah-i, tang opposition INDIA teloktep "life support" nung lir; telung nung mangatettep ajanga opposition teloktepi BJP anema menokdakteter, ta metetdaksü.

New Delhi nung Hindustan Times Leadership Summit nung jembidang Abdullah-i, opposition teloktepi longjemer ruling party anema meinyakteter, ta ashi.

"Onok 'life support' nung lir, ajisüaka kodang kari onok ajungshidir onok nokdakteter, ajisüaka Bihar election osang ama atalokdang maneni onoki tashi meiti akümer, aser kari onok ICU-i anir aotsüsa akümer," ta National Conference lenir Abdullah-isa ashi.

Tawa Bihar assembly election nung INDIA teloktepi tamakok tulu ngua liasü, aser iba dak sendakba nung pai, opposition teloktepi Nitish Kumar tanaben NDA teloktepi yokba ajanga opposition-i

tamakok angu, ta ashi.

"Onoki Nitish Kumar tanaben NDA dangi yok, ta ni bilemer," ta pai ashi.

Abdullah-i, opposition teloktepi asalentong junga meyanglutet, ta ashi.

"BJP-ibo election ka tembangli taruba elction atema renem tenzüker. Ajisüaka Opposition-ibo election atongsü ita ishika lia dang election atema renem tenzüker, aser khenkhenbo nomination file asüba tatembangbuba anogo nung ang teloktep yanglur," ta pai ashi.

Abdullah-i jembiba o dak sendakba nung BJP otongdar, Shehzad Poonawalla-i, pai INDIA teloktep dang tanüdangtsü sayuogo, ta ashi.

Paisa, Congress-i aniba INDIA teloktepi Nitish Kumar nungzüka yok aser Bihar nung Jharkhand Mukti Morcha nem menden peria magütsü, ta ashi.

"INDIA teloktepi Nitish Kumar nungzüka yok. INDIA teloktepi Bihar nung JMM nem tim maongka magütsü, ibayongji

parnoki teloktep toktsü," ta pai metetdaksü.

Poonawalla-i, NDA teloktep ya tashitait teloktep ka lir aser mangdang tejangia lir, ajisüaka Congress yabo menden arishiba aser ochimashiba teloktep lir, ta ashi.

Bihar nung Legislative Assembly elections November 6 aser November 11 anogotem nung agia liasü aser November 14 nü vote zünga osang sangdong.

Iba election nung BJP-i aniba National Democratic Alliance (NDA) teloktepi menden 202 nung takok angu aser Rashtriya Janata Dal (RJD)-i aniba Mahagathbandhan (MGB) teloktepi menden 35 nung dang takok ngua liasü.

JD(U) nungi chief minister Nitish Kumar-i tang agi 10benbuba CM tenangzüka agi aser deputy chief minister teinyakdak Samrat Chaudhary aser Vijay Kumar Sinha nati tang agi tanabenbuba deputy chief ministers tenangzüka agiogo.

US-i India nunger kaketshirtem visa thitsüba indang Parliament nung jembi

New Delhi, December 06 (Agencies): Taküm April ita nung US sorkari sangdongba mapatong tasen ka kübok tilateri aibelenba atema America nung India nunger kaketshirtem visa thinentsür, ta Parliament nung external affairs minister S. Jaishankar-i metetdaksü.

Tilateri aibelen atema F1 visas (international kaketshirtem atema non-immigrant visas) thinentsüba atema India-i tebilemtsü akaba US den lemsatepogo, ta pai metetdaksü.

Rajya Sabha nung tasüngdangba ka langzüdang pai iba osang ya metetdakja liasü.

Indian Union Muslim League MP, Haris Beeran-i, social media nung 'post' balala, talisa Gaza pusema lemsatepba atema US-i kaketshirtem indang visa 6,000 jungnüa thinentsüogo; anungji item ama takoksa anguba kaketshirtem atema India sorkari tiyongsüi ia inyaker ma?, ta asüngdanga liasü.

Jaishankar-i tezüluba nung telangzüba agüja, "Kaketshirtem indang visa thinentsüba timtem ya 2025 küm April ita nungi tenzüka liasü. Iba mapang nungji US secretary of state-i mapatong tasen ka sangdonga tilateri aibelen atema-a visa thinentsü. Kaketshirtem indang visa aika thinentsüba onoki nguogo. Ano tatalokba aika nung, peisasa linük toktsür aotsü atema kaketshirtem

rongshia liasü," ta metetdaksü.

"Kaketshirtem aikati indang-indanga consulates aser embassy den tongtepratepa liasü, aser akokba tashi consulates aser embassy-i tiyongsüi ia inyakogo. Tilateri aibelenba atemabo visa methinentsütsüla, ta onoki America nem angatetdaksütsü merangogo. Ajisüaka visa agütsüba temedenji par sorkar melung," ta pai metetdaksü.

Bodhbarnü US sorkari, visa thinentsübaji linük security dak sendakba nung telemtetba agiba lir ta shiogo, ta Minister-isa metetdaksü.

"Anungji visa dak sendakba telemtetba agitsüji parnok temeden lir; ibaji par linük security den sendaktepa lir," ta paisa metetdaksü.

Taoba ita ishika tsüngda US sorkari shisaliok rejutem aser bendanger kaketshirtem anema temzüng kar latetogo. US nung kaketshir telok balalai Israel-i Gaza amakba anema longkak aitha atema US administration-i universities dang mepelar.

US nung aliba college tem nung International kaketshirtem ket nung Student and Exchange Visitor Information System (Sevis) kübok kuli kaket tejangia alitsü nüngdak, ajisüaka Yihuda nunger sempaa longkak aitha dak sendakba nung Donald Trump administration-i international kaketshirtem aika indang Sevis documents thinentsüogo.

Linük nung lenirtem aikati BR Ambedkar nem akhüm agütsü



New Delhi, December 06, 2025: Honibarnü Parliament House Complex nung linük Tir Droupadi Murmu, tatong Tir CP Radhakrishnan, Ato kilonser Narendra Modi, Lok Sabha Speaker Om Birla aser Union Minister Kiren Rijju nungeri linük temzüng yanglusang B R Ambedkar sür küm 69 ajungba anogomong nung asür nem akhüm agütsüba sülen tangokba noksa nung angur.

New Delhi, Luchii/ December 06 (Agencies): B R Ambedkar sür küm 69 ajungba anogomong nung linük Tir Droupadi Murmu, tatong Tir C P Radhakrishnan, Ato kilonser Narendra Modi aser lenirtem aikati Parliament House complex nung asür nem akhüm agütsüogo.

Parliament kima Prerana Sthal nung Lok Sabha Speaker Om Birla aser Opposition lenir Rahul Gandhi densema lenirtemi linük temzüng yanglusang, Ambedkar kürakyanglu matsüngdang naru tokja asür nem akhüm agütsü.

Tesülen linük tatong Tir C P Radhakrishnan-i X ajanga, "Mahaparinirvan Diwas anogomong nung ni asen linük temzüng yanglusang aser Bharat

Ratna angusang Babasaheb Dr Bhimrao Ambedkar nem akhüm agütsür," ta metetdaksü.

Ato kilonser Modi-i, Ambedkar ya mangdang aliba lenir ka liasü; pai ajak atema temeden, ajak kasa züngshitsü atema inyak aser temzüng yanglua toktsüba ajanga maneni linük len anir, ta ashi.

Ato kilonserisa, meimchir taküm akhümket wazüka ayutsü aser democratic inyakyim tashi itdaksütsü atema Ambedkar-i aika ajungshi, ta ashi.

Honibarnü Parliament complex nungsa Social Justice Minister Virendra Kumar aser Parliamentary Affairs Minister Kiren Rijju na densema lenirtem aikati Ambedkar kürakyanglu matsüngdang naru tokja akhüm agütsüogo.



December 06, 2025 nü Jharkhand kübok Deoghar nung Union Minister/BJP National Tir JP Nadda, Jharkhand Assembly nung opposition lenir Babulal Marandi aser tangartem BJP core party senden nung adendang tangokba noksa nung angur.



TIR YIMYIM YIMOBILEM (EDITRIAL)

DIMAPUR SUNDAY, DECEMBER (LUCHII) 07, 2025

Temulungjang nungi adoker

Asenok tebang nungi kechi jembir, iba kasaji asenok mulungjang nung bilemer. Aji oda, asenok mulungjang nung bilemba kasaji tebang ajanga o kümer adoker ta Laishibai ashir. Kenü anogo, Yisu nütsüngtemi teka memetsüki chi chiyongba Farisi aser tezülurtemi angu. Ibaji Yihuda nung yimsü aser sobaliba anema liasü. Anungji, Farisi aser tezülurtem jagi Yisu dang kechiba par nütsüngtemi tsürabur yimsü raksatsür (?) ta asüngdangba Mathi 15 nung zülua angur. Atangji, iba tatalokba ajanga Yisui asenok dang teti kümdanga alitsü asoshi tangatetba tajung ka agütsür. Aji oda, Yisui ashi, "tebangi kechi air, aji agi nisung memenener, saka kechi tebang nungi adoker, aji agi nisung menentsür." Iba kasa o ya Yisui nisungtem jar ashidang, Peteri mangatet, anungji pai par tesayur dang iba o entepba tetetzüji asüngdangba asenoki kasa Laishiba nungji angur. Idangji, Yisui asenoki angatettsüsa tejangba nung ashi, "tebang nungi kechi air, aji teboki alur aser metsümeshiba mapang endoker, saka koba tebang len nungi adoker, ibaji temulungjang nungi adoker aser iba jagi nisung menentsür." Iba kasa o ya tanü asenok taküm yimya dak kanga peta lir. Asenoki aiben asenok tebang mejungaka, temulungjangbo junger amai bilemer. Aji oda, asenok bang agibo o tamajung jembir saka temulungjangbo tajung amai asenoki bilemer. Ajisüaka, Laishibai ashir, nai kechi jembir, ibaji nü mulungjang nung bilemba jembir, anungji nai jembiba amaji na lir. Nai jembiba o agi kar peladaktsüra mesüra nisung kar temoatsü ngura, nü mulungjang tangar asoshi aria bilemba temaitsü sayur Aji oda, nü bang agi nai tangar den Yisu temeim indang jembira, iba jagi nü mulungjang nung teti Yisui na kümzüba asoshi tenüngsanga bilemba temaitsü sayur. Aji oda, tangar kar timtem nung shisabolua alidang, parnoki nü o nung mulung süngzük angutsü imlar asü ? Aji oda, nai tangar asoshi nü bang nungi o adoka sarasademtsür asü ? Nü bang nungi taremsük aser temeim o adoker asü ? Mesüra, nai jembizüka yokba o agi na sasatsüsa nai jembir ? Nai jembiba o jagi tangar mulung yirudaktsür asü ? Mesüra nabo tangar nüngsen jembidang dang pelar asü ? Teti tangar aitsüa dang jembiba nung na jangra atemer asü ? Na jashidang tangara jashitsüsa o tamajung jembibaji tim danga ta nai bilemer asü ? Aji oda, tebang majungba agi ashi, nabo nisung tajunga ta nai bilemer asü ? Nü mulungbo temerük ser nung nü bang nungi maremtet o tamajung adoker ta bai bilemer asü ? Iba amaji nai bilema lira, ibajibo nüsasa na ashioktsür asütsü mesüra asen dak aliba temeneni asen mashileni anir asü. Atangji, aseni teti o tajung jembitsü bilemer saka mejembitetter. Aseni jembiba o agi tangar mulung kanga yirudaktsür. Ibaji Yakob 3:3-10 nung ashir, koba ama mi tila agi arem tulu aronger, yamaji temeli agi teraksa bener arutsür. Atangji kasa bang nungi tenüngsang aser atakatem adoker. Ajisüaka, kasa Laishibai ashir, yamaji masütsüla, kechiyong kasa tzüpokdak nungi tzü tanang o tako na külemi madoker. Asenoki tangar yirutsüsa jembiba atema asensasa asen metena asenoki jembitettsüa akok, saka iba jagi asenok meshitettsü makoktsü. Nisung tsüngdangbo asen mulungjang mimbanga yutettsü saka Tsüngrem tsüngdang asenok tebilemba mimbanga meyutettsü. Atangji, asenok ajaki o tajung jembiner, saka mejembitetter, kechiyong asenok mulungjang tamajung agi sünga lir. Mathi tapu 15 nungjisa ashir, tamajung mapatem inyaktsü asoshi bilemba ajak tamasa temulungjang nungi adoker. Item tamajung bilemba nungi asenok taküm kümzüka alitsü asoshi tamasa asenoki Tsüngrem dang asen mekokmein shisatsü ajak asoshi taidok meshitsüla. Asen mulungjang tama merüktettsüla aser tanüla temeshi ajanga asen bang azüoktsü asoshi tashi meshitsüla. Kodang asen mulungjang nung tanüla temeshi lidaktsüdir, asenoki tangar dak tamajung mangutsü, anungji tangar majung masüksü aser tangar jashitsüsa o tamajung mejembitsü. Idangjibo tangar yirudaktsüba temeli agi tangar peladaktsütsü aser Tsüngrem tenüng asangtsü.

OLEMSABANG

KIYIMDANG SEPOKBA HON KERI AYOK

~ Wb. Temjentenzük

(Iba Yimjangjem otsü ya Tir Yimyim aser Bookipedia nati ayongba toktep nung Tasembuba takok jenjang anguba liasü.)

(Yashi adok nungi...)

Tsürabur ka ama Sentijen aser Narola tenati kanga kümdangba kaji kechasüdanga par kibong sentem agia sentsüh tsüah malitsü kanga meranga liasü. Tenapronglai akokba tashi agi pei yimer lokti tentet nung nongloksüba mapatem tamakok maludaktsü inyaktsü meranga aru. Ano tangari meinyaknüba mapatema akokba tashi inyaka, kechisa tenyatenpongdir tila küma ajaki ashiba anga anitaka alitsü merang. Arogo aser lokti tentet balala nung yamaji akokba ajak agi meranga anitaka aru. Iba ama lokti nung tangar tenzüka arubaji ajanga aika den metetepa lia aodang, par kibong koda masüba tia mapangtem nung teyari tulu ngua aru.

Mapang ka nung par kibong nung ya atalok. Sentijen temeim kinungtsü temang nung timtem agi atong. Mapang shia la tashitsü atua dang aliba agi mozü shiteter bushia Naga Hospital Kohimai ao. Mozü shiteteri la temang kol balala nung ajidaktsü. Anogo ishika lir la tasü nung lung lir ta puteta tekaratiba nung agiteta entoktsü atema mozü shitetertemi la dang metetdaktsü, aser chia atatsü atema mozü kar zülutsü. Par kibong atema aji kanga dang shisabulutsüba osang ka liasü. Teka nung sen aliba ajak la temang tendangba mapang agimar, ano tasü nungi lung agitettsüba nungjia sen aika nüngdaktsüba ta kanga khuret bena Tsüngrem dang sarasadema aru. Anogo aika tenati sen lenmang kong nungi angutsü ta bilemdanga arur, saka tepteta tetugulen mongui liasü! Tenati kar metetepa aliba kibongtem ajak dang mapang balala nung sen apua agidanger aliba agi, shiba dang danga masüngdangteti liasü. Tesütatem nung pai tena kiyim dang sepokba hon keru ayoktsü bilemtet. Pai kanga süoki ia bilembaji kodasür sentsüh atsüha alir tilar taküm kati hon keru mesüra honzüke enoker litettsü? Hon aser taribi denji pa temeim kinungtsü taküm taoba, anungji pa atema iba mapang nungji hon aser taribiji menügdak ta atongtet! Abenjagi, pai panepji pa temeim kinungtsü Narola dang hon keru aser honzüke ayoktsü telemtetbaji shia liasü.

Aji oda, Sentijen aser Narola tenati iba telemtetba agir külen anogo ishika temulung shiranga liasü. Kiyimdang tena temeim nüngtem sepokba hon keru aser honzüke tayoki aoba anogoji kanga temulung shirangtsü anogo ka liasü. Iba anepdangji lai la honzüke aser tenaprongla keriji semzüker taleptsü agi kanga junga aleper juli tila ka nung enok. Tanurtem kaketi rijui aoba ata lir, tena taktang telung nung hon sepa aliba juli nungji tenapronglai teka agi nemeter, Tsüngrem nem tenüngsang agüja sarasadem. Iba ama tia ka nung tongzüksü atema senti hon tena nem moatsüba atema tenüngsang agütsüdang tebuttsü tongtonglatsü atua temulung raksaa ajeb! Sarasadem temer tebuttsü la mesüzüka yamai shia liasü, "Tsüngrem o nung tia mapang ajak nung Tsüngrem nem tenüngsang agüjang ta shia aliba ama anati iba atema temulung meraktsü. Ali rongsenjibo asenok arishia anema dang lirbo Tsüngremi asenok nem ano moatsütsü. Ne temang atemaji dang bilemdi. Yakta surgery agir tajungba akümtsübaji tongtibangba lir ta shia la süngzükdaktsü". Tatem nung tebuttsü pa temulung nung Tsüngrem dang yamai sarasadema liasü, "Kibuba Tsüngrem nai moatsüba hon ya yoktettsüsa küna nem talir ka moajangma, amen". Yamajisür temeimsüka apuaniji ola madoki yimti nung hontsünger dokan bushia aotsü kidang nungi ayazük. Shishidak tenati hontsünger dokan ka, "sonari" ta zülur angu. Sentijeni pa mesüng dang hontsünger dang jagi oa jembitsü mulungtet. Pa temeim kinungtsübo tangar dokan ka kima nung noktaka yutsü. Pa hontsünger dokan tonger tebuttsüji lepa reprangdang dang, la tejak shimakshimaka kümer angudang pa mulung tera mesüngjemteti aküm! Pai hontsünger dang parnok timtemba agi ya yokner, anungji yimlibilema aliangni ta asüngdang dang, hontsünger bazzar nung tang kechi hon jenjang lir aji agibo pai malitsü ta langzüng. Ibaji angashir Sentijen kanga aoksa! Aji oda süaka tena atema tanga lenmang kecha maliji hontsünger kechi jenjang alang iba jagi ayoktsüsa aküm. Temeimsüka tena küt nung aliba senti rongsen ajak agi honzüke aser tena temeim nüngtem sepokba hon keru ayokba senji meshia bener arua pa temeim kinungtsü nem amoktsü. Aji sür tena kidangi shilangdang lai tanurtem nem tachitsü kar alitsüdi ta sür hon ayokba sen jagi, tanurtemi kidang tetibo machiba chiyungtsü tajung kar alia bentsü, aser kidang achitsü atema aonsotsü kar shishir kidangi shilang. Panüji hon ayokba mapang nungji Sentijeni kechi südir süaka, künübosa la nem hon keru aser honzüke meyiba agütsütsü ta pa sasa pa mulung nung azüngashia lemtet. Talangka melii iba hon ayokba sen jagi tebuttsü surgery takok ngua agitet. Tena küt nung aliba sen den ano metetepa alir temeirtemi teyari agütsüba agi par kibongi iba hospital tongpang koktet. Par kibong atema iba tatalokba ajanga Tsüngremi yimya balaka nung jembiba mapang liasü. Parnok hospital nungi adoker kidang tanurtem den sarasadem agidang, par kibong nung mapang shia temoatsü ngua atenba ken, osangtajung ken kaketi nungi "Tsüngrem Temeim" ken aten aser tetsüi laishiba nungi Tenüngsang ken tapu 23 zünger, par pezüprongla teka amteper Tsüngrem nem tenüngsang agütsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Philippines nung 'Jesus Reigns' sentong nung aikati shilem agi



Philippines nung 14buba 'Jesus Reigns' sentong nung adenertem tangokba noksa nung angur.

December 06, 2025: November 30, 2025 nü Philippines nung 14buba Jesus Reigns Celebration Sunday nung nisung meyirjang aikati shilem agiogo.

Philippines nunger dang masü saka iba linük nung aliba bendangertemia province balala nung iba anogomong nung shilem agi.

Jesus Reigns Philippine Celebration (JRPC) ya 2012 küm mezüng tenzüka liasü. Iba ya non-denominational movement ka lir, koba ajanga Arogo balala nungi tamangertem ajak longjemdakja Tsüngrem külemer, sarasademer aser nüburtem nem teyari agütsüba mapa balala inyaker.

Taküm iba anogomong omenji "Living Sacrifice" liasü; iba omen kübok shilem agirtem dang Tsüngrem nem ajak bendanga agütsütsü ajungshia liasü.

Sentong ayongzükertemi Khristantem dang Tsüngrem nem pei taküm rangben bendanga agütsütsü, Tsüngrem sentsüwangshi atema alitsü aser alima nung Tsüngrem yimli yangertsü atema inyaksü ayongzüka liasü.

Iba anogomong nung linük tesem balala nung tamangertemi gari nung Lai tekong balala zülur yimdong süa senzü aser province aika nung tekülem sentong agia liasü.

Taküm iba anogomong ya teimla aser tanela asentenshi nung rangloker agi.

Sentong ayongzükertemi, "Onoki iba anogomong ya 2012 küm nungi tenzüka küm shia agir. Iba sentong ya yimtenren den kecha sendaktepa mali," ta metetdaksü.

Sentong ayongzükertemi 2 Putipuyang 7:14 nung ajemdaker ajemalu, sarasadem, tatok meshiba aser Tsüngrem bushiba ajanga linük taneptsü angutsü ayongzü.

Iba anogomong sentong nung shilem agir kati social media ajanga, "Linük tesem ajaklen lenirtem aser shilem agirtemi telongjem osang sangdongogo. Kodak aser alima nung taküm alir ajaki Kibuba tenüng ulutsür. Chuba tenüng province ajak aser Philippines tesem ajaklen sangdongang, tanga tenüng masü saka Yisu tenüng sangdongang," ta lemsatöp.

Iba anogomong nung shilem agirtemi pei tamang sangdonga "Jesus Reigns" ta tenetben ayimdena liasü.

Social media nung nisung kati, "Asaperang aliba aser mejangjaba tensa mapang ka nung onoki teimla indang tenüng ka dang lir ta sangdonger, aser iba tenüngji Yisu lir," ta metetdaksü.

Pastor1,000-iYirusalemnungaliba'WesternWall'nungsarasadem

Jerusalem, December 06 (Agencies): US densema linük balala nungi pastor 1,000 dak temai Israel semdangba ajanga puti otsü tasen ka yangluogo; parnoki tesüiba anogo ishika Israel nung tesem balala semdanga senzüdar.

Yakünü parnoki Yirusalem nung Western Wall semdanga sarasademogo.

Yisu Khrista alima nung aliba mapang Temple Mount-i atuba lenmang tetenzüklen 'Southern Steps' nung parnoki sarasadema tekülem agia liasü, iba sülen parnoki Western Wall nung sarasadem. Yihuda nunger yimsü (Judaism) nung Western Wall ya temeshitiba tesemtem rongnung ka lir.

Osangbenertem den jembidang Friends of Zion tentetsang, Mike Evans-i, "Iba ya ajanga tsüngnep tulu yutsütsü. United States Tir-ia iba ya angutsü aser meteta akümtsü," ta ashi.

Evans-i, "Onok team nung White House nungia aika lir. Yangi aliba pastor 200 shi Donald Trump den tesendaktep lir," ta metetdaksü.

Küm shia Western Wall nung nisung million 16 shii sarasademer, ajisüaka pastor tem teimtibai iba tesem semdanga sarasademba yabo tang mezüng asütsü.

Evans-i, "Pastor aser influencers shia nem sarasadem onok kaka agütsü. Kü ket nunga Uri Arad liasü; iba nisungba ya (2023 küm) October 7 nü tepseta liasü. Ajak ket nung sarasadem onük kaka liasü. Parnoki ibaji amer Western Wall nung parnok kibongtem atema sarasademtsü," ta metetdaksü.

Pastor jenti Israel-i anir aotsü atema Evans-i Israeli Foreign Ministry den longjemir inyak.

Evans-i, "Laishibai yamai ashir. 'Onoki Yirusalem nung yimjung atema sarasademer. Parnok meimertem azükarutsü'. Asenoki item senti nisungtem (Israel nunger) atema sarasademtsütsü nüngdak. Parnoki tebang agi meshitetba timtem jenti ajangshia aruogo. Parnok dang temeim sayutsü aser parnok pusemstsü atema onok yagi arua lir," ta ashi.

Western Wall nung pastor temi Rabbi Shmuel Rabinovich ajurua liasü. Pai Tenüngsang Ken 121 zünga Tsüngremi Israel wazüka ayuba lemsatöp.

Rabbi Rabinovich-i, "Iba telok ya America aser Israel na tsüngda tembar yima aliba metetdaksütsü atema aru. Iba teloki yamai ashi, 'Onoki tajung bushir, alima yangluner aser Tsüngrem yimli yangerner," ta metetdaksü.

Rabinovich-isa pastor tem dang, "Onoki nenok dang pelar aser onok pusemba atema pelar. Talisa iba ama timtem mapang ka nung aser aikati onok yirutsünüba aser tepsetnüba mapang ka nung nenoki onok nungitba atema pelar. Tang onoki tip tenet tsütsülen nungi raradar, aser America onok den lir. Onoki nenok dang pelar. America nungertem, onoki nenok dang pelar," ta metetdaksü.

ANOGO ABEN TSÜNGREM DEN

TAJUNG INYAKTSÜ MELAKLI

Aser asenoki tajung inyakba nung melakli, kechiyong asenoki temulung makai mekümlra, mapang shitak nung arutsü. ~ Galatia 6:9

Shirnoki tangatetba tajung nung aser temulung ajongai tajung inyaksü meranger aiben parnok taküm nung tetsükdaksü aser timtem tatitang balala ajurur. Yamaji aikati iba tejashi mesüra tatitang mekokteti joko mapa tajung inyaksü mejangrar aser kenyongi sentoka toktsür.

Saka Pauli züluba shiti ajanga asenok dang tamang nung teremzük agi timtem-tuoshi ajak nung pa den külemi inyaker ka ama alits?, aser tajung inyakba nung melakteti alitsü ajungshir. Aser aji asenok kisüng saksalemshitsüba masü saka ITe.5:14 nung shia aliba ama, adianutem shirnok mashilen jajar parnok kümdangdaksütsü, shirnok temulung züklaa or lir parnok tashi itdaksütsü, tashi maitertem yarits?, aser nisung ajak tsütsü talangka aremzüktsü indang ajungshba angur. Adangji, shirnoki aji inyakteter Tsüngremer temoatsü agi sempeta parnok moatsütsü.

Temeimbatem, tenyar Paul ajanga ajungshiba o asenoki mamadokli aser mapa tajung inyakba nung lakteta mekai Tsüngremer tashi nung anogo shia jajatsü asen nükjidong südi. Yamaji iba tejang asenoki kenübosa arutsü teimla yur maneni tajung inyakba nung shilem agitsü ayongzüker. Amen.

Nisung kati Samaritan's Purse indang tayimtsü ka 'hijack' asü



December 06, 2025: Samaritan's Purse Tir aser December 02, 2025 nü South Sudan nung prangpong amer nisung kati Samaritan's Purse indang tayimtsü 'hijack' asü.

Iba tatalokba nung nisung shinga meyiru aser pilot-i tayimtsüji anendaksüba sülen keddangsertemi iba nisungbaji puogo.

Samaritan's Purse ya non-denominational evangelical Khristan organization ka lir. Iba telok yagi alima tesem balala nung timtem ajangshiba nisungtem nem teyari agütsüba den külemi tanela tsütsüa teyari agütsür.

1970 küm nungi tenzüka Samaritan's Purse-i rara ajanga takoksa angurtem, kanga sensakertem, lendong balala agi kongshirtem aser tashidak balala agi shirangertem yaria aruba den külemi Khrista temeim lemsateper.

Samaritan's Purse CEO ji Rev. Franklin Graham lir. Pa ya nüngtugu sayutsüngir asür Billy Graham'er jabaso lir.

Samaritan's Purse indang tayimtsü 'Cessna Grand Caravan' ji Mongolbarnep Juba nungi apusoa liasü. Iba tayimtsü nungji Maiwut nung alirtem atema medical supplies bener liasü.

Tayimtsü hijack asüsangji Yasir Mohammed Yusuf lir ta jangjaogo.

Tayimtsü mapusodang pai mima tayimtsü tesülen takdang ka nung atsüka liasü aser tayimtsü apusoba sülen pai pilot dang tayimtsüji Chad-i anir aotsü tuyu.

Pilot jagi tayimtsüji mapang talangka longa anir senzüba sülen pai Yusuf dang, tayimtsü nung toztü inoksemstsü nüngdaker, ta ashiba sülen tayimtsüji Wau jila nung anen. Iba sülen police-i Yusuf pua liasü.

AO OSHI ANGAZÜKDAK:**TANÜ ANGAZÜKTSÜBA OJANG****Tsükshi**

(v) kongshi, tangshi (hit)

* Arem nung senzüdang süng nung kü kolak tsükshi.

Tsüksü

(n) tsük nung jang mait, tsük tapong (empty rice grain)

* Tsüksü septoker tsük asener.



Tir Yimym

OLONG PAITEP # 7352

1						2				3
								4		
5		6				7				
8										9
								10		
				11		12				
		13								
14						15				
				16						

TIPLIN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjiding - 4
11. Tenük-telen mejungi aküm - 5
13. Terok nungi adokba - 3
14. Meimchir telemsa - 3

OLONG PAITEP # 7351 TELANGZÜBA**TIPLIN :**

3. Tekara, 6. Teben, 7. Ngaja.
8. Asü, 12. Ako, 15. Senti,
16. Inyak, 17. balaka

LANGTSÜNGLEN :

1. ratet, 2. Tebung, 3. Tensa,
4. Kensü, 5. Jaka, 9. Sak, 10. Tenyar,
11. Tasü, 12. Agima, 13. Okila,
14. Lokti.

**BOMB YA MANÜA NO!**

Tambur : Alokba, Alima nung mapang ajak den putepsangji shiba aka?

Alokba : Alima nung mapang ajak tensa ajak den putepsangji Bomb ya lir, kechiaser Bomb yagi Durga Puja nunga puteper, Diwali dena puteper, Christmas benjong dena puteper, New year denang tapetba, Shiti meindanga kanga puteper, kechisarena asaya ajak den puteper, ano tasüba benjong nunga puteper, ajidang masü Rivival dena kanga puteper, Anungji Bomb ya manü manüa no!!!!

Tambur : O Alokba !

~ **Lilir : I. Kilang Ajem, Indisen, Dimapur,**

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jeliae e-mail : tiryimym@gmail.com nung yokang mesüra Tir Yimym bureau tem nung agüjang.

SIT-i Zubeen Garg ken o atema charge sheet benoktsü ariteper

Guwahati, December 6, 2025

(Agencies): Assamese kentener Zubeen Garg ken o atema December 10, 2025 matongdang charge sheet benoktsü

atema bushisüngdangertemi meranger.

Okadaki December 18 matongdang agütsütsü ashiba jakdang charge sheet benoktsü ta Assam Chief Minister Himanta Biswa Sarma-i ashi.

September 19 nü Singapore nung Zubeen asüba sülen Special DGP CID Munna Prasad Gupta lenisüba kübok Special Investigation Team-i iba

tatalokba bushisüngdanga arur.

Iba nung main investigating officer Rosie Kalita-i anepdang 3:00 ako tashi CID office nung mapa inyaker. La ya züngsem 9 agi akümiba telok nung dena lir aser parnoki charge sheet atema kulitem bendener.

"SIT-i bushisüngdangtemogo aser documents tapak 3,500 shi renemogo. Ni Advocate General den inyaka aotsü atema senden ka menogo" ta CM Sarma-i ashi.

"December 18 matongdang chargesheet benoktsüla kechiyong menurabangla tai tonglokja alirtem bail angutsü. Ni

SIT dang December 6 aser December 12 tsüngda charge sheet agütsütsü shiogo" ta paisa shisem.

Tang tashi nung iba ken o nung tai tonglokja alir nisung 7 tepuokdak yua lir. Parnok ya festival organiser Shyamkanu Mahanta, Garg manager Siddharth Sharma, par kinunger aser Assam Police DSP Sandipan Garg, drummer Shekharjyoti Goswami, co-singer Amrit Prabha Mahanta, aser personal security officer ana- Paresh Baishya aser Nandeswar Borah nunger lir.

Manipur Governor-i State Kala Akademi Awards agütsü

Imphal, December 6, 2025

(Agencies): Manipur Governor Ajay Kumar Bhalla-i Hokolbarnü Manipur State Kala Akademi Awards (MSKA), 2023 aser 2024 lema agütsügo.

Imphal nung sentong ka nung pai nisung 69 nem sempettem agütsü. Sempettem rongnung MSKA Lifetime Achievement Award,

Fellowships, and awards in Dance, Music, Shumang Leela, Thang-Ta, Tribal Culture,

Literature, as well as the Young Talent aser Young Writer Awards dena lir.

Manipur nung painter Thoidingjam Tombi Singh nem MSKA Lifetime Achievement Award agütsü.

"Telemsa balala nung sempet angurtemi Manipur nung artistic sempet tajung aliba jungkai adoka sayur" ta Governor Bhalla-i ashi.

Item maparen ajanga state putiotsü, maitsü aser lokti tangatetba alima dang sayur ta

paisa ashi.

1972 nungi Manipur State Kala Akademi ajanga tongti shilem agia aruba atema tenüsang agütsür ta Bhalla-isa shisem.

"MSKA indang fellowships aser awards ajanga Manipur nung artists, writers, aser fine arts practitioners tushia amshiba sayur. Akademi-i tongtipang sobaliba nisungtem tushir aser nisung 69-i mapa tajung inyakba ajitetba atema pelar" ta paisa metetdaksü.

Meghalaya-i national competition atema lanur 40 shimtet

Shillong, December 6, 2025

(Agencies): Meghalaya nungi lanur 40 tashi Delhi nung national-level competition nung shilem agitsü shimtetogo.

Chief Minister's Youth Engagement Programme 2025 tembangba sülen parnok shimteta liasü.

Chief Minister's Youth Engagement Programme 2025 ya state-level programme ka lir aser Convocation Hall, NEHU Campus nung December 5 nü tembanga liasü.

Meghalaya state tenüng nung shimtetertemi telemsa balala nung shilem agitsü. Parnoki music, dance, sports, painting, aser science nung tokteptsü.

"Tang inyakang. Khenkhenbo yaser ta asüba ya kodanga majurur" ta Directorate of Sports and Youth Affairs nung state youth officer Bobby Wahlang-i lanurtem ayongzük.

"Iba sabang ajanga ni temulung uludaksüogo aser tanga district tem nungi arurtem den tesentaktep yanglu" ta painting competition nung takok angur Rishanborlang Khongphai-i ashi.

Iba sentong nung wadang balala nung tetoktepba agia liasü. West Khasi Hills-i quiz, guitar, folk songs aser one-act play telemsa nung takok angur.

East Khasi Hills ajanga talent show group performances, folk

dance aser science exhibition nung takok angur.

Tanüngba takok angurtemji Ri Bhoi nungi Ikasius Samayang-i declamation, East Garo Hills nungi Futehsia A Sangma-i story writing aser South West Khasi Hills nungi Memmillen Snaitang-i poetry writing nung takoktem anguba lir.

North Garo Hills-i tug-of-war competitions men's category nung aser East Garo Hills-i women's category nung takok angur.

Iba sentong tembangdang Directorate of Sports and Youth Affairs Director D D Shira den district sports officers, coaches aser education ketdangsürtem aden.

Asia nung tzümetzüng lendong nung asür 1,750 adenogo



Indonesia tzümetzüng

Jakarta, Luchii/December 6 (Agencies): Asia kübok linük balala nung tzümetzüng aser anentsüh lendong agi kongshir alir million aika nem teyari agütsütsü atema teküzmükertem aser volunteer tem timtempetba mapang asürtem timba kümdar. Lendong agi tamajungtiba kongshir aliba Indonesia, Sri Lanka aser Thailand linüktem nung asürtem 1,750 dak tema jungogo.

Indonesia nung nisung 867 asüba jangjaogo aser nisung 521 samar tang tashi bushia aliba Honibarnü Sumatra asetkong kübok Aceh province-i sangdongba data ajanga sayuogo. Iba tesem nung nisung 800,000 dak tema pei talidak ki toktsür aotsüsa kümogo.

Sri Lanka nung sorkari nisung 607 asüba sangdongogo aser nisung 214 tashi samar bushidar. Item nisungtem ya-a sür alitsü ta bilemer. Tir Anura Kumara Dissanayake-i ashiba agi, iba lendong ya linük asoshi kanga dang tetsüdahtsü tulu ajangshiba lendong ka lir.

Tzümetsüng ajanga Thailand nunga nisung 276 süogo aser Malaysia nunga nisung ana asü aser Vietnam nung tzünglu kanga sashia aruba ajanga anentsüh aludaktsüba sülen nisung ana asü, ta state media sangdong balala ajanga metetdaktüsü.

Indonesia kübok Sumatra tesem nung lendong nungi jenbortem ano maneni tzümetsüng arushiba aser anentsüh aluba ajanga timtemtepdar. Indonesia indang meteorological agency-i taoba hopta sangdong ka ajanga Aceh nung Honibarnü tashi tzünglu kanga sashia arutsü aser North aser West Sumatra-a lendongbang nung lir ta metetdaktüsügo.

Aceh angh Muzakir Manaf-i ashiba agi, teküzmükertem teberem tashi lishi agi mobanger aliba tesemtem nung samar alirtem bushidar.

Kasa mapang nung kinük nung aliba tesemtem nung alirtem yatzü agi meneptsü ana nung lir, ta paisa metetdaktüsü.

"Nüburtem aika tenüngdakba osettem agi anünga lir. Aceh kübok kinük nung aliba tesemtem aika metongjemi lir," ta pai osangbenertem dang ashi.

"Nüburtem tzümetsüng agi masü saka aya agi asür," ta paisa shisem.

Aceh kübok Tamiang tesem nung yimtsüngtem ajunga apungerogo, ta Muzakir-i metetdaktüsü.

"Aceh Tamiang tesem ya tekolak nungi bonglang tashi ajunga raksaogo. Iba tesem nung lenmanga ajak raksaogo.

"Yimtsüng aser sub-district tem aika tenüng dang kümogo," ta pai ashi.

Sri Lanka nung nisung million ana dak tema tzümetsüng lendong agi kongshiogo, aser Hokolbarnüa ketdangsürtemi tekümdangtsü metetdaktüsügo, kechiyong tzünglu maneni kanga arudar aser iba ajanga anentsüh alushitsü ana nung lir.

Sri Lanka indang Disaster Management Centre (DMC)-i ashiba agi, ki 71,000 dak tema raksaogo, kong taoba hopta tzümetsüng aser anentsü lendong nung ki 5,000 shi raksaba densema lir.

DMC-i Hokolbarnü ashiba agi, linük kübok tesem aika nung tzünglu maneni arutsü imlar, kong linük teyongtsü nung lendong agi tamajungtiba kongshir aliba tesemtem densema lir, aser iba ajanga anentsü tali aludaktsütsü akok ta tsübua bilemer aser tang merekmeju mapa benoka

inyaka aliba nung tetsükdaktüsü adokdaktüsütsü.

Taoba hopta iba tesem nung typhoon ana aser cyclone ka agi kongshiba sülen tzünglu kanga sashia arua tzümetsüng adokdaktüsü. Mongintemi Al Jazeera dang ashiba agi, iba amala lendong ya taoba mapang dang nungi timba atalokdar aser aji tzü mopung melenba ajanga lir.

Ozüng alema arem leprepa aoba, koba palm oil atema takhangba kanga akümba dak sendaka lir, iba ajanga Sumatra nung timtem lendong aika ataloker. Iba tesem nung süng aika ayonglangleni apunger aluba nguogo.

Indonesia nung mining, plantations aser morok mi ajanga küm shia arem aika samayonga aoer aser küm ishika tsüngda aremtem aika leprepa odar.

Indonesia indang Forestry Minister Raja Juli Antoni-i Hokolbarnü ashiba agi, pa indang office-i company 20 indang logging licences meyipa agiogo aser iba ajanga ali hectare 750,000 kümzüktüsü, kong tzümetsüng agi kongshir aliba Sumatra tesem densema lir, ta Indonesia indang Antara news agency-i metetdaktüsü.

Environment Minister Hanif Faisol Nurofiq-ia, Honibarnü northern Sumatra kübok lendong agi kongshir aliba tesemtem nung palm oil, mining aser ayongbanglen power plant company tem inyakyim anendaktüsügo.

Griffith University, Australia nung Centre for Environment and Population Health atema Indonesian programme coordinator Febi Dwirahmadi-i ashiba agi, arem ya sponge ama lir aser tzünglu kanga sashia aruba mapang iba yagi tzü ajemer.

ALI TAYOKTSÜ LIR

Residential land any size available @450 per sq.ft. Situated at Signal Angami and Thahekhu boundary. 5 minutes walk from Livingstone School, next to St. Vincent Angel Home and CM father's Seminary. No land filling required. Plot ready for building directly. Approach road from both Signal Angami and Thahekhu.

Ph. No. 9233794855 / 9089970912

70	(6)	122	46	78	95
55	(5)	127		73	93
60	(4)	119		38	118
55	(3)	117		TO	118
60	(2)	115		65	65
		115		(10)	(11)
X	72	60		TO SIGNAL ANGAMI	
	(1)	72		60	60
		60		67	(12)
SOLD	50	SOLD		60	67
	40			60	(14)
				(13)	60
					40

Pakistan-i Afghanistan nung civilian 4 tepset



Pakistan nunger sepaitemi Hokolbarnü Khost province kübok Gurbaz district nung civilian tem aliba ki amakba sülen nüburtemi ki raksar aliba asadanga aoba noksa nung angur.

Kabul, Luchii/December 6 (Agencies): Afghanistan nunger ketdangsürtemi ashiba agi, arrtsü nung Pakistan sepaitem den khatepba sülen civilian 4 tepsetogo. Saudi Arabia nung yimjung atema sensaksem takok mongutetba sülen kidanger linük ana tsüngda tensa tamajungba küma odar.

Afghanistan nung Kandahar province kübok Spin Boldak district angh-i nisung asüba osang ya Honibarnü jangjatsüogo.

Linük anapongla nungi ketdangsürtemi ashiba agi, rara ya Hokolbar aonung tenzü. Linük anapronglai mezüng injang khaloktsüba atema kati ka dang tai tongloktüsütepa arudar.

Afghanistan nung Taliban sorkar otongdar Zabihullah Mujahid-i ashiba agi, Pakistan nunger sepaitemi Spin Boldak district amak aser iba ajanga Afghanistan nunger sepaitemia telangzüba agütsütsüsa aküm.

Kasa mapang nung Pakistan PM Shehbaz Sharif indang otongdar kati ashiba agi, Afghanistan nunger sepaitemi Chaman arrtsü nung shingaia kecha mashi ser nung injang khalokja liasü.

"Pakistan kümküma lir aser linük litsü aser lisopurtem kümzüka ayutsü atema bendanga agütsür lir," ta otongdar Mosharraf Zaidi-i ashi.

Afghanistan nung alirtemi AFP news agency dang ashiba agi, rara ya aonung 10:30 ako nungi tenzü. aser ghonda anashi khatepa liasü.

Kandahar indang information department tekolakba Ali Mohammad Haqmal-i ashiba agi, Pakistan nunger sepaitemi light aser heavy artillery amshia amak aser mortar khaloktsüba civilian tem ki dak kongshia liasü.

"Telok anapronglai mulunga agizükba sülen raratep anenogo," ta pai shisem.

Taliban-i 2021 küm sorkar atsüngba sülen Afghanistan aser Pakistan na tesendaktep mejungi kümogo. Pakistan Taliban (TTP) densema telungpur telok balala nem tejenokdak agütsüba atema Islamabad-i Kabul aitsüba ajanga mangatettep ya tali adokyonga aoer.

TTP puri 2007 küm nungi Pakistan kübok tesem balala maka arudar aser parnok ideology ya Afghan Taliban den mesükteper ta shia arudar. Bodhbarnü Afghan arrtsü anasa lenmang tezülen bomb ka pokdaktüsüba sülen Pakistan nunger police officer asem tepset. Iba tesem amakba ya TTP puri nangzüko.

Pakistan-isa, Balochistan Liberation Army aser ISKP pur jenokdaktüsüba atema Afghanistan aija arudar. Ajsüaika Afghan Taliban puri iba taitüsüba magizüker aser Pakistan telung nung security dak sendakba ken o ya parnok khuret masü, ta shia osang tai prokshiba aser arrtsü nung tensa mejungi kümdaktüsütsü asoshi rongshiba atema Islamabad aija arudar.



Johannesburg: Honibarnü Pretoria nung khatepba lendong ka atalokba sülen asür nisung 11 jungogo, ta South African Police Service (SAPS)-i jangjatsüogo. Iba lendong ya Atteridgeville kübok Saulsville Hostel nung ataloka liasü.

Asian Games 2026: IOA Treasurer Sahdev Chef de Mission asütsü



Sahdev Yadav

Luchii/December 6, 2025

(Agencies): Indian Olympic Association treasurer Sahdev Yadav, shiba national weightlifting association indang tir lir pa taruba küm Asian Games indang Chef de Mission asütsü shimogo.

Iba asayamung ya Aichi-Nagoya, Japan nung September 23 nungi october 8 tashi asayatsü renema lir.

Ajaki jangja aliba India nung table tennis asayar Achanta Sharath Kamal deputy Chef de Mission asütsü. Iba asayamung atema renemshiba ketdangsütsü atema Sports Ministry-i züngsem 15 agi kümtetba committee ka tentetsüba nung pa-a shilem ka asütsü.

Iba committee ya sports secretary lenisüba nung

inyaksangshitsü aser IOA tir PT Usha co-chair asütsü. Züngsemtem rongnung London Olympic medallist aser Mission Olympic Cell (MOC) züngsem Gagan Narang densema lir, shiba taoba küm Paris Olympics nung India indang Chef de Mission liasü.

Taoba mapang India nunger hockey asayar Viren Rasquinha-a MOC nung züngsem ka ama densema lir. Rasquinha ya asaya aliba mapang kanga takok tajung ngua asayaba asayar ka liasü aser pai asayartem khuret angateta lir asünung teyari tulu agütsütsü imlar.

Tanga züngsemtem rongnung joint secretary of sports Kunal, Khelo India joint secretary Vineel Krishna, IOA CEO Raghu Iyer, Hangzhou Asian Games Chef de Mission BS Bajwa, den head of TAGG (Target Asian Games Group), Executive Director (ED) Teams, aser Sports Authority of India (SAI) CEO nunger densema lir.

Gill nem SA den T20 asayatsü temelaba agütsüogo



Shubman Gill

Luchii/December 6, 2025

(Agencies): India T20I team vice-captain Shubman Gill, South Africa den T20 asayamung asayatsü atema BCCI indang Centre of Excellence nung Sports Science team-i temelaba agütsüogo.

Kolkata nung Test asayaba mapang tekong yiruba sülen Gill CoE nung rehabilitation program tembanga agiogo.

Gill ya T20I squad nung züngoksema lir, saka pa anema ali nung dang asayatsü liasü, aser rehabilitation aser skill-based Return To Play (RTP) protocols tembanga agitsü nüngdaka liasü.

"Shubman Gill CoE nung rehabilitation tembangogo aser format ajak nung asayatsü atema pa anema lir ta sangdongtsü atema nüngdakba

criteria ajak tongtetogo," ta Centre of Excellence-i Sports Science and Medicine (SSM) team nem metetdaksüogo. Team nung physio Kamlesh Jain, strength and conditioning coach Adrian Le Roux, aser sports doctor Dr Charles nunger densema lir.

Pa tang asaya aliba ODI asayamung nungbo shilem magitet, saka pa Centre of Excellence nung rehabilitation tembanga skill training- batting, fielding, aser match simulations- takok ngua agiba sülen T20I asayamung atema temsüa aliba jangjaogo.

Asayartem shirnok T20I squad nung densema lir, parnok Cuttack nung Honibarnü ajuruteptsü, kong Deobarnü mezügbuba training session agitsü lir.

World Cup draw: Argentina mezügbuba asaya Algeria den asayatsü



Luchii/December 6, 2025

(Agencies): 2026 World Cup atema telok lemsaogo aser Defending champions Argentina aser European champion Spain na group stage nung team kanga tashi tait denbo ata mali.

Washington kübok Kennedy Center nung team 48 asayatsü aliba asayamung atema draw süogo. Iba asayamung asayatsü asoshi joko ita trok dang anunga lir.

Lionel Messi aser Argentina team mezügbuba asaya Algeria den asayatsü aser parnok Group J nung Austria aser Jordan dena asayatsü.

European champions Spain team Group H nung mezügbuba asaya taküm mezügbuba qualify asüba Cape Verde den asayatsü aser iba sülen Uruguay aser Saudi Arabia na den asayatsü.

Thomas Tuchel-i aniba England-a Group L nung Croatia, Ghana aser Panama nunger den ata lir.

Kasa mapang nung France team Group I nung Senegal aser Erling Haaland-i aniba Norway team aser intercontinental play-off akokba team ka den asayatsü.

Tang mezügbuba temaba jenjang nung aliba team pezü- Spain, Argentina, France aser England- semi-finals tashi nungang asayadaksütsüsa draw süogo.

2026 küm iba asayamung ya United States, Mexico aser Canada nung June 11 nungi July 19 tashi asayatsü. 2022 küm World Cup nung team 32 dang asaya saka taruba kümbo team 16 talila bendenloka team 48 asayatsü, koba tetezü asaya 64 dang masü 104 asayatsü.

2026 World Cup atema

telok telemsa:

Group A : Mexico, South Africa, South Korea, a qualifier

Group B : Canada, a qualifier, Qatar, Switzerland

Group C : Brazil, Morocco, Haiti, Scotland

Group D : United States, Paraguay, Australia, a qualifier

Group E : Germany, Curacao, Ivory Coast, Ecuador

Group F : Netherlands, Japan, a qualifier, Tunisia

Group G : Belgium, Egypt, Iran, New Zealand

Group H : Spain, Cape Verde, Saudi Arabia, Uruguay

Group I : France, Senegal, qualifier, Norway

Group J : Argentina, Algeria, Austria, Jordan

Group K : Portugal, a qualifier, Uzbekistan, Colombia

Group L : England, Croatia, Ghana, Panama.

Ashes Test tasembuba asayatsü Cummins renema lir

Luchii/December 6, 2025

(Agencies): Australia captain Pat Cummins-i ashiba agi, pa England den Ashes Test tasembuba asayatsü atema temang anema kümogo. Pa yiruba ajanga mezügbuba Test ana nungbo masayateti liasü.

Fast bowler Cummins ya Perth nung mezügbuba Test akokba team nung densema liasü aser Brisbane nung tang asaya aliba day-night match nunga masayar. Pa teberem yiruba ajanga masayatetsüsa aküm.

Arisih küm 32 tain asayar ya tanabuba Test asayatsü terabo timla liasü saka masayatet, ajisüaka pa Adelaide nung December 16 nungi asayatsü aliba Test nung asayatetsü ta temulung lema bilemer.

"Ni asünga nets nung ball onshitsü aser iba sülen Adelaide-i aotsü aser idakjia ball onshitsü," ta Cummins-i host broadcaster Fox Sports dang ashi.

"Tilater tebilemtsü kar aliba dak alaker ni asayatsü junga dang lir. Temang kanga junga kümogo," ta pai ashi.

Cummins-i tang tashi nung Test asaya 71 nung wicket 309 agir lir aser Adelaide Oval nung pa indang bowling average 21.19 lir.

Australia team nung fast bowler Josh Hazlewood-a densema mali aser Cummins masayaba mapang Steve Smith lenisüba nung team asayadar.

Cummins-i ashiba agi, asayar shimertemi pa Brisbane nungi asayadaksünüa liasü, saka kanga karara asütsü aser ano yirushitsü akok ta bilemba agi telemtetba agishia liasü.

"Ni tanga bowler tem atema iba ya tim masü ta bilem," ta pai ashi.

"Risk agitsü atema iba Test ya shitak masü ta bilem, anungji ni ano hopta ka masayai atatsü asoshi telemtetba agia liasü," ta pai ashi.

BILEMDANGANG

"Na meyilongi dang oaka memerangdangertem dang nungibo kanga agi tejakdang lir."